

摘藻堂四庫全書薈要

集部

欽定四庫全書薈要卷一萬六千三百五十四

集部

道園學古錄卷二十七

歸田藁一

元 虞集 撰

賦

東臯賦

為趙德
莊作

出東郭以騁望得逶迤之方臯窈窕脩筠之舍盤桓嘉
樹之高秀野綠縟長渠翠濤界畦疇以分畫列藩籬乎
周遭汎崇蘭於舊畹薦幽澗之新毛鳶魚樂兮天光雲

影之動蕩虎豹蔚兮山輝川媚之薰陶結幽居以靜好
不窺園以為遨或視明星而弋鴈或饗朋酒而魚羔其
有棄敝屣於軒冕託遺響於歌騷者乎吁嗟惟麟黍稷
在畿眇故封兮江海悵王孫兮不歸載耘載耔載裳載
衣忽十世其將遠挺三君而奮飛奉賢書以造廷並策
名於常旂鸞翔鳳翽赫其有輝值炎精之既淪遽歛翮
於熹微於穆季侯知德者稀中田有廬兮種瓜北山無
蹊兮采薇悄悄隱憂兮顧懷懇懇菑畲兮疇依慨膚士

之不億懼俯仰之多違侃侃廣文特起無儔內有明賢
之助外嬰憂患之酬二親高年一身百謀煦煦陽春英
英涼秋屢專席於名郡常曳裾於諸侯觴詠不間於絲
竹旨甘頻及於交游積累之勤百福是適婉婉子孫食
德不渝嗟予少時遊于名門揮弦飛鴻垂綸遊鯤老至
不知車懸身存夕草載露黯然銷魂訊故老於岑隅索
履跡於崖根秀娟娟兮既長鬱蒼蒼兮彌尊孰辟世於
醉鄉樂舒嘯於丘園晨光粲其盈庭鶴鳴聞於九天叅

徐既豐華實載繁俎豆衣冠古而又文東臯之人其昔
之桃源也邪

芝亭永言

古詩四言

環洲詩為蔡天璧作

溪有清流環我中洲
襍華鮮明芳草和柔
詠有文君鳴有睢鳩
采采遊女侃侃良疇
載泳載游在我中洲
逝逝無端沿沿無止
既采蘋藻亦有蘭芷
觀彼嘉魚一日千

里彼畝彼畝皆為方田分合雍丘我流璧旋星迴于天
雲媚于川君子樂豈眉壽永年言命輕舟言載百壺駕
我乘黃履我雙鳧汎汎彭蠡至于匡廬詠歌以歸清風
載途

冰雪相看亭

趙君有道之先故宋南渡時自東都徙分宜三百年
於茲矣其大父登進士第仕至文林郎湖北憲司幹
辦公事其父兩舉江西轉運司進士覃恩受官宋亡

不復仕城東故地美竹萬箇作亭其間而隱焉名之曰冰雪相看信國公之子平遠宣慰之所題也有道信厚敦愿衣冠容氣翩翩然有王孫公子之遺風敏稼穡以服徵賦謹詩禮以保族姓無外驚無妄求弗變其父之志以老其身以長其子孫是以士君子稱焉夫元亨利貞之為德猶春夏秋冬以為時也君子觀乎運序以自處則合於時措之宜而不過焉方其以振振麟趾之賢處富貴之極則大亨春夏之時也

自其來南族蕃以久非秋之利乎其在有道為冬之
貞無疑矣冰至堅而不折雪至潔而不汙凜然相看
不接於他物誠得處貞之道也予聞而善之故為之
賦詩焉

挺挺直筠琴岡之陰豈無春陽匪今斯今高宜於天下
蟠地深不易其節侃侃素心豈無膚敏白駒駸駸我獨
考槃樂乎幽林堅冰在淵積雪在岑獨往不迴悠然行
吟采采紫芝園綺是尋還求陶生撫我素琴邈乎古人

副戎夙欽

竹林七賢圖

瞻彼修竹下臨清流文石偃隄華松蔭丘植表界壤翦
茅宅幽梁度高巘臺隱中洲方床讀書異宮同休詠歌
相聞觴豆相求或蒔名藥或釣游僚課藝嘉植坐思遠
游濯纓微波看雲良疇逸而不放儼而自脩泰哉沮溺
邈乎巢由按圖以觀永宜春秋孰若五君遺其故儔糟
粕塵世高踪莊周我懷古人遯而違憂安得揮弦以招

湛浮

竹溪六逸圖

悠悠逝川矯矯逸民攜書相從敷席水濱支頤負暄揮
羽却塵躡屐遠道隱几重茵幽響中發虛觴載陳投我
嘉實含和茹醇優哉悠哉及茲良辰山有鳴鳥郊有游
麟濟濟以寧我懷古人

古詩五言

題汪華玉所藏蘭亭圖

衡茅負晴旭有客至我門共披會稽圖山木盛繽紛衆
賢坐水次飛觴汎汎夷曠各有趣高閒知右軍幽情
付後覽陳迹感前欣悠悠千載來不異更旦昏探穴問
神禹望海悲秦君逝者皆如斯死生固奚云所以鼓瑟
人思從童冠羣春服涼新浴歸歟聊永言撫卷不知老
遐思在茲文東南極積水日暮多浮雲

寄題曹元賓尚書臨流圖王繼學叅政畫

昔聞適炎服中道臨清漪滴滴蕩荒日悠悠動寒颼來

者何滔滔逝者不可追聖有川上歎晝夜固如斯解纓
手自濯浩蕩忘險夷高人今摩詰萬里同襟期抽豪寫
幽思帶雨更題詩三年反田里春河釋冰澌舟楫繫野
樹灌木晞晨曦上堂喜懼集艱辛謝親慈入室換野服
登山采靈芝庶以永年壽豈惟療朝饑開囊見舊物感
慨深係之歲晚金石友看雲立多時憐我不共看寄言
令我知來鴻春若早去燕秋易衰近遠不相覲加餐慰
遐思

玉隆留題

仙真治茲山重阜隱延廣冲奧元氣會運至法靈響與
世作司命神宇廓宏敞及門春雨來玄感副夙仰摩挲
晉時樹託身何蕭爽千載抱微息日月共來往欲為黃
髮期日待紫芝長上天垂光彩月出江海上海人不可
待惆悵理歸鞅

黃堂留題

雲館息塵鞅夜聞春雨聲溪水傍階長仙茅新綠生曉

氣動原野曠分見夷平神真昔叅合觀泉宅幽貞儼然
師弟子歲來會秋清遺民千載後高宴從簫笙因嗟蚤
好道晚歸濯冠纓矯首望遠海駕言羽翰成神仙在平
地崎嶇愧凡情太乙有移名中洲良可營

記夢

夢行衡廬間千仞過蒼壁崇高仰神明深廣下不測雲
雨蓄盤礴時至如欲出網緼尚回旋揮霍忽奔逸物怪
匿岩穴慢若俟霹靂黑波汎高樹木葉走崩石升身登

玄間縱觀龍變跡俯視九州野草木有輝澤乃在風雨
外手畫素三尺揮毫極動盪落墨更沉鬱圖成示坐人
共笑不可得顧瞻以跼蹐恍惚增歎息因之命肩輿出
門聊有適大術何舒舒白鶴從數客略經幽澗濱便上
青松側憑高望遠水雙景蕩虛碧拂石共客坐芳草藉
尻膝忽然聞鐘聲睡覺北窓席

次韻陳溪山梭履

頗憶蜀井西梭櫚每易討披心割魚子束皮充筓掃澗

工巧紉履文織象花草輕鬆隔沮洳緩步得堅好長疏
獻圯下會期後三早知君貴賤履陟降恒有道憐我涉
世深垂誠不待造兢兢歷淵冰縮縮奉師保時行不違
矩庶慊歲年老

其二

解鳥還上方歸山據枯槁禁足結僧夏陳編謝探討隱
几或過晝凝塵遂忘掃行庭不見人誰或踐生草寔由
筋力衰無復馳走好前年當此時嚴召出城早追度龍

門水賜見沙領道鼎湖忽踰年始克罷趨造感君素履
詠幽貞可長保番番茹芝人長歌豈知老

其三

六月乃屢雨良田不憂槁獨念桂林戍觸熱赴南討道
路備攘掠所過淨於掃縛人夜送軍吏卒何草草蠻獠
亦人類義利啓戎好尋原可制亂機要貴及早夜來送
者還頗言竭橫道諸軍四面集同月約皆造誰為饑渴
謀性命安可保藜藿雖滿槃對之令人老

浮丘公吟寄赤城陳道士入山有遇為溪山壽

浮丘生上古形神蓋不泯說詩秦漢間安知非斯人世
俗苦淺迫無能信真淳雨雲不待族飛光越窓塵豈知
有道者千歲一息勻金精歷可鍊色重無磨磷蒼蒼紫
玄峰咫尺天北辰神明寂已定尊高此依因握機稟元
化同流溥無垠所以赤城子從師踐荆榛三周日却中
志確神乃親廬間玉雪相旭陽射光新稽首受餘啜骨
換非昔民不遠恒在茲睠然願知津先生旦有聞為恭

若逡巡賤子請執御端輓駕飛麟

為錫哩布哈題陳立所作龍眠山圖

變侯起高科得邑舒水上民淳事稀簡田野甚夷曠戰
爭遺跡泯山水良足賞幽棲南昌尉英爽赤壁將古仙
家白雲美人化黃壤岵岵龍眠山一士獨可尚高懷托
千載妙畫極羣象向來讀書處春雨草木長夷遊昔賢
遠瑤席共來享彈琴坐終日微泉散清響來者安可期
徘徊以悵悵畫圖記彷彿聊以慰遐想

和陳溪山韻

幽人慎素履古道思獨往
瞋目登高臺浮雲不足上
丹砂煉仙骨沆瀣濯神爽
遠懷澄江靜耿若孤月朗
河漢自傾注山川邈遊想
歛跡倦飛翼歸耕故時壤
好風從東來空谷感遺響
詔書薦遺逸郡府屬高仰
聊持東湖水往助敬亭賞

和陳溪山送蘭花韻

幽林有藂蘭菁菁秋不衰
憐彼采藥人不識敷榮時
涼

風動綠葉清露生華滋世傳神農經圖書竟空披深根
寄連茹藉以瓊瑰詞同心永為好豈但服食宜先民昔
有言所貴希見知舊聞絕行仙晚有童孺姿南陽有黃
華西山多紫芝度世未聞道咀嚼空莖枝湛一保冲炁
執御正不竒靈苗無助長無為以熙怡始信斷金利終
古真不移千古同一息敢忘君子期

送空岩印公還徑山

東出楞伽室西望香爐峯曲折披翳藿蕭條倚枯筇然

燈共過夜曝日忽經冬天山斷緣想海國識行蹤忘言
及生滅抽簡托踈慵追憶塔中相表茲雲際封摛文謝
五鳳永護煩雙龍

題張觀海所携虛舟竹所二毛圖

虛舟倚亭臯修竹相因依水木有清華魚鳥淡忘歸鷺
羣晚色靜鶴羽傍林暉似是鑑湖曲幽栖掛朝衣古道
日已遠昔人相見稀蒼茫寫雲霧蓬壺是耶非

送龍翔高獨峰上人還金陵

承詔寫宮榜，馳使出丹闕。黃金射江海，光景依日月。邇來垂十載，感遇嗟白髮。神靈在雲漢，猷猷慨明發。祇園何潭潭，夙志返超忽。幽士住精舍，諸妄久息歇。浩劫鑑止水，高峰獨蕭萃。觀察勝願力，知我心兀兀。清風不可執，振錫出林樾。

送海東銛上人十首

用雲霞出海曙梅柳度江春為韻

積水衆鷗滅，春空藹餘雲。掩室坐修竹，天花散繽紛。上人東海客，來去何見聞。飛錫還日下，珠宮浪沄沄。

日色出海水千波散明霞一杯承足來九載不為賒要
觀香爐峰折蘆長風沙微吟動林響蒼龍送浮槎

我昔叅泰霞東望候日出子從日下來海水中蕩滄坐
受龍女珠簾垂夜光室持還定何有長空斷鴈一

為法不辭遠遨遊歷年載衣中得故珠終夜動光彩還
持一支葦歸泛萬里海駕言乘桴行沙際如可待

旨蓄崇虛豆生芻長冰暑無堪餉遠客桑下若為住行
囊掛屋壁破榻夜風雨神光發慧劍耿射東海曙

燕坐共禪月行吟向孤梅有懷匡廬山老人友崔嵬洗
鉢三峽水振衣東林臺乘槎動歸思欲去更徘徊

山居如老禪坐致不請友何方簷下雲識我門前柳翠
竹不碍山黃花紛在手未覺酬對難離妄亦無取
老胡昔東游勝士乃西度到岸無彼此不憚費筏屨要
之心本空一了不移步龍宮解相迎黃金已先布

百鍊成利器千金來海邦清霜凝秋水國士歎無雙持
正行正令魔邪孰不降觀子製名字高風凜寒江

止觀覓心要律儀檢凡身密言轉相付海刹幾秋春奇
哉善根熟一徹無逡巡子來得何法歸報日邊人

楚石琛藏主自蔣山歸却欲就叢林閱藏同舟清
江之上賦此贈之

手攜北山雲却上西江水月明洲渚生葉落風不起虛
舟不移棹寒波釣金鯉銀河轉碧落北斗去天咫龍吟
匣中劒虎躍弦上矢殺機誰敢當吹毛豈輕試貝葉啟
千函木榻脫雙履惟應勝壁觀悠悠度年歲

題東郊山房

秀挺東郊山雲氣常覆之林丘翳幽潛流泉發芳滋盤
桓在中谷良疇漾清陂開堂直岡景長年誦書詩孝友
夙所敦求道遠有師雅志尚端潔凡近諒難知康樂昔
賜履詠歌足遐思啓書訪前聞往跡無所遺瞻彼南澗
松深根連喬枝亭亭植高節鬱鬱含令姿衆木不同泯
悠哉副深期

題蒙庵為黃石谷賦

東南有高丘下臨萬家邑汪洋決春潤沃衍盛秋入羣
山若浪波起伏翠重襲靈運好奇險高平罕相及幽人
園綺間周覽度原隰隨山導清泉積石拾層級結庵以
蒙名果行信所執良時一來游朔月九交十門當星斗
高隴臥風雨濕一川燈火歸賓從雜車笠登高愧能賦
騰身竦山立

為黃氏賦大雅詩

岐山鬱嵯峨鳴鳥昔有聞周公盛制作經綸以彌文朝

事接燕饗勸勞兼賓軍肅雖述盛德工歌贊前勲流蕩
桑濮靡何由返咸雲陳肆輒有見吳季真不羣公子有
古絃歷然宮徵分大雅忽有作青春日方殷高堂以居
之樂康永欣欣

己卯十月廿二日從宜春郡幙嚴伯威觀南軒新
閣登舟有賦却寄同遊者劉粹中賢良

茲郡多美泉小大各有神深潤決溫厚草木何光新披
圖閱名世顧皆仙佛人退儉寡外驚懷哉此良民退之

文既遠泰伯學未醇昔我朱與張遺言存縉紳東湖有
新閣下臨南澗濱周眺忽已晚皎然仰空旻虹梁亘溪
流落日車馬塵曾丘間叢祠鐘鼓嚴昏晨江潭歎搖落
名邦感宜春為治古有道川原隨所因華構相為雄大
雅竟誰陳移舟古峽口西望蒼嶙峋浩蕩無與語逝波
絕垂綸

秋堂

秋堂者臨川吳生文明之親舍也生才甚清美賦詩

婉麗無塵滓之汨觀其同門未之及也昔胡邦衡以
詩人薦朱文公大儒豈以玩物以成名哉性情之正
冲和之至發諸詠歌自非衆人之所能而士大夫各
以其見見之耳生未可自喜自畫也是以為賦秋堂
詩云

閭巷多囂塵秋堂獨高深有子能讀書幽懷發微吟天
高風露下澗泉落危岑神仙絕飲食穢濁無留沉所以
聽夜誦共愛風滿林神清易以哀情長恐成淫大冶昔

有作九牧歸吉金
爇樞下五石工成振鴻音
宣風萬物暢神祇
肅有臨鳳鳥鳴岐
山人文示來今候
虫入床下嗟哉苦勞心

清風拂高堂
舊席忽已除
下堂具甘旨
上堂列琴書
垂紳夙夜至
再拜問起居
誦詩已三百
習禮少壯餘
納交君子室
執御長者車
為樂古之道
誰能笑其迂

題雪泉齋

長河互凝合
微泉自温活
蛟龍依以生
抱困待春發
南

雪不到地流泉常在山飛英散絕澗流澌響潺湲融結
各有方不息在無二觀茲保深長乃得養生理濯尊薦
寒冽春陽向熙怡君子遠莫致永言以相貽

平江開元雪牕光禪師訪予臨川山中其歸也予
與賓客用一雨六月涼中宵大江滿分韻送之不
足予為繼之而予分得一字

積雪何處高蜀山最靄萃海東極孤絕目送斷鴻一徘徊
杪櫺樹宴坐但空室園果墮宿雨當晝從定出八月

露水繁石鉢滿華蜜相會豈無因分床便深密

賦彭氏靜深堂

君子憺無欲淵然事幽潛貞居觀物初天機引休恬寂
寂象愚朴容容無斃厭羣動不知止謀思墮鈎箝反息
不及踵乘舟膠漸漸豈知本湛一不與利欲兼圖書發
聖緼受命字不占戒慎保靈秀先幾發微纖進善取損
益閑存日惟嚴浩浩厚有積悠悠浸何淹盈科以時行
小人慙屬饜虛堂積雨霽光風草侵簾空洞溥龍澤止

水澄秋蟾善學在年富勇哉副遐瞻

秋山行旅圖

春夏農務急新涼事征遊飯餽既盈橐治絲亦催裘升
高踐白石降觀索輕舟試問將何之結客趨神州珠光
照連乘寶劔珊瑚鈎乘馬垂首宿縱目上高丘策名羽
林郎談笑覓封侯大行何崔嵬日暮推回輶古木多悲
風長途使人愁羸驂見木末足倦霜雪稠谷口何人耕
禾麻正盈疇出門不及里酒饌相綢繆壯者酣以歌期

願醉而休安知萬里事有此千歲憂

為題馬竹所九歌圖

屈子久去國行吟山澤秋思君不復見婆娑感巫謳仰
瞻貴神遠俯慨深黃幽衝波起浩蕩玄雲黯綢繆初陽
翳扶桑莽蒼蕩海漚渺渺君夫人遺玦在中洲壽夭乘
陰陽孰知制命由慨然長太息悲歌寫離憂想象以惆
恍開卷令人愁

清明山房詩為危太朴作

矯首望太清正色蒼以玄皦皦何歷歷日星高轉旋游
塵雜氛氣起滅尋丈間容光見擾擾孰與為控搏所以
學仙者凌空怡妙顏質化入常寂疑暉托空山據會觀
往來生死何足患妙哉太朴子難為世上言


次韻太朴良友對何仙舟讀書山中見懷之作

得謝荷休澤逍遙在巖阿結廬庇風雨樊圃拳藤蘿塞
坐古人書日夕猶詠歌追念少壯日玩愒亦已多兢兢
事補塞奈此遲暮何美人百里內邈若隔山河興懷貽

好音緼藉三春花報言慎芳歲卷石崇魏莪



道園學古錄卷二十七



總校官庶吉士臣張能照

校對官檢討臣龔大萬

膳錄監生臣賈捷三

欽定四庫全書薈要

集部

道園學古錄卷二十八
九



臣董誥詳校

詳校官助教臣謝登雋

欽定四庫全書會要卷一萬六千三百五十五

集部

道園學古錄卷二十八

歸田藁二

元 虞集 撰

芝亭永言

古詩七言

江樓看劍歌書趙子昂劍銘後

豫章高秋宴高閣乃出此劍相娛樂當時冶鑄絕精英
土蝕沙沉更銷鑠遺質所存如冷電江光不興晝光却

神光內閔氣逾深識察誰能動冥漠等閒千年不一試
壯士酣歌謾揮霍嗟予衰朽雪滿顛空對涼風起天末
或言江中有蛟孽當煩仙人下寥寥吾故臨風拂其鏹
俾伏崖陰無敢作

劉忠肅公之四世孫中書舍人諱震孫之曾孫益
之題其居曰雲松巢予家與劉氏累世之契故為
書忠肅公文集之首詩三篇并賦此詩與之

丞相昔遊泰山頂天風浩浩春晝永玉檢微茫不可求

但覺靈霞熟丹鼎白日人間如水流前代衣冠成古丘
悠悠憂患何足計直道十年橫素秋徂徠之松數千尺
東連海上莫烟碧中書偉人如玉立每向南風望東北
濁世公子何翩翩却憶匡廬還謫仙芙蓉出水耀初日
五色光新天為妍我今僑居廬阜側西視我眉歸未得
豈無雲錦晚相娛月落終懷雪山白森森喬木魯東家
河間禮樂更光華勿忘先世舊遊處吾秣爾馬膏其車

吳興趙子昂十馬圖

昔在秘閣見十馬云是韋偃之所畫此圖位置畧相似
心神偶同豈臨寫馬種本自渥洼來濯濯清泉更瀟灑
常恐一旦風雨至蹙踏波濤遂神化豪雄意氣今豈無
未見深沉如此者君看最後臨岸驄自是真龍無世價

畫馬

百年升平却走馬立仗天閑常見畫蕭灘灘頭八十翁
却寫西來大宛者高蹄如鐵項如鈞風鬣蕭蕭首背秋
常見貢來騎不得長嘶要蹴崑崙丘

題畫

連昌宮裏古墻陰
積雨過春黃竹深
老樹無枝交屈鐵
泣石有書名錯金
吮豪池上寫幽鳥
承恩春日風光好
當時執戟今白頭
却對蕭森倚秋昊

空山歌

高空之山聶公宅
稚川作圖纔數尺
秋天薄雲千仞表
春雨喬林百年物
憶昔侍郎鎮成都
將佐盈庭賓客趨
錦官城外笳鼓發
駟馬橋邊高蓋車
先廬舊在小東郭

丞相祠堂同寂寞嚴公同訪杜陵家退之亦到淮西幙
我眉差我久不歸江水娛人秋日暉坐看蓬萊變桑海
自古南城天下稀公子親迎陳氏館我初至撫猶弱冠
看君揮翰甚風流豈想重逢鬢毛換君言中間一再來
數見先公胸次開鶯花風雨必求友水竹園林持酒盃
嗟予晚歲始能退寧有文章驚海內平生不受簡書畏
故家高致君應最圖中山色積翠濃雖欲舍子將焉從
蜀人相如最能賦行倚山木歌高空

為燮玄圃題黿溪春曉圖

芙蓉山陽萬家邑石嶺戴轍縈紆入溪水西行夜雨深
連村桑柘春雲濕昔因荒迴少官府日莫狐兔作人立
自從置縣二百年稍有衣冠更俗習讀書進士比舍聞
潤屋黃金亦家給山中白日浮雲多負乘因仍足車笠
燮侯世胄國勲舊射策君門耻泫龍衣朱衣作監列星宿
遠人豈意高軒及援琴不鼓書牒稀彈缺無魚賓客集
綉衣使者停車見黃堂太守下床揖登高望遠送飛鴻

攬轡駸駸度原隰人言桐鄉人愛我我愛桐鄉重於悒
畫圖千疊山木稠菱舍蕭條莫忘葺

題馬竹所畫

霜清木落江海空一棹歸來何處翁雙松千歲如鐵石
為爾回薄旋天風憶昔神龍劍所化夕卧滄波弄明月
望中冉冉雲氣生直接銀河上瓊闕

霍元鎮規模董北苑米南宮父子寫山水雲物殊
有標致見示春江捕魚圖遂賦此

春江聚網萬魚急漁人相謹魚相泣負薪深山何處樵
利害相乘不相及海鷗冥冥秋影微黃葉江南一棹歸
人間得失兩無迹不廢山水含清暉

南岡

華蓋三峰立天表山北山南青未了曾看雨雲出太虛
幾送餘霞落飛鳥岡頭春歸露未晞梧桐鳳皇相因依
卧龍之孫思外氏悵望輝光生翠微

題何大夫畫馬

國朝畫手何大夫親臨伯時閱馬圖伯時絕憶鐵面語
放筆驕騮懷此都北都大夫八九十千馬萬馬在胸臆偶然
數鬣落江南捲束上箱謝槽櫪

同開先南楚悅禪師觀息齋畫竹卷於崇仁普安
寺煜公之禪室蓋煜之師一初本公所藏也因記
延祐甲寅息齋奉詔寫嘉熙殿壁南楚與之同寓
慶壽寺時予方為太常博士俯仰之間已為陳迹
乃題其後云

嘉熙殿裏春日長集賢奉詔寫蒼筤邇來二十有五載
飄零殘墨到江鄉匡廬高人昔同住身見揮毫鳳鸞翥
木枯石爛是何年脩竹森森長春雨

題村田樂圖

尺素自是高唐物瑩如秋水宜設色何人畫此畎畝間
二三老人若相識茅屋蕭條古樹下農務未殷牛在野
或怜鸚鵡脫籠繫或弄獼猴咲真假老翁政自如兒嬉
高髻襁負相扶持古時粉社祀田祖移饌高亭隨所宜

抱甕初來未貯酒亦有生鶯宛延首村優競携樂具至
犬怪雞驚兒拍手拄杖出門欣見賓雜華滿庭生好春
歲時無事得如此擊壤何必非堯民騎驢過橋殊矍鑠
携具荒陂來赴約定知張果千歲人遊戲人間共盃酌

柳塘野鴨

江南水退秋光淺風柳叅差萬絲捲鴛鴦在梁鳧在渚
蕩蕩扁舟去家遠千艘轉海古長策白粲連江動秋色
斷浦折葦野水闊爛爛明星且將弋翠盤擎露夜深寒

玉色亭亭落月殘
太液池頭黃鵠下
夢中曾見畫中看
丙吉問牛喘圖

少陽用事春猶淺
丞相公行問牛喘
三公職事知者稀
嗟彼德微蒙策免
天子有道守四夷
中心無為日萬幾
遠有甸服近有畿
夙夜明哲發裳衣

江貫道江山平遠圖

江參去世二百年
翰墨零落多無傳
人間幾人寫山水
誰能意在揮毫前
昨見石林舊家物
春雷疊嶂初破墨

我和草詩頗豪放三者相望都突兀險危易好平遠難
如此千里數尺間高雲舒卷非散地麗月照耀皆名山
我持美脯酒一斗墨汁盈盤可濡首江生精神作此山向
山呼生當至否高秋銀漢天無雲帷中冷然來夜分黃
茅嶺頭華蓋頂畫我獨訪浮丘君

為汪華玉題所藏長江萬鴉圖

雲巢幽人愛江渚抽思揮毫寫橫素波瀾不驚潦水盡
秋氣晶明絕烟霧征帆去棹不相覩
巖岸曲洲旋總堪賦

孤村城市僅如蟻百丈牽江直如縷蕭蕭木葉洞庭波
歷歷晴川漢陽樹蒹葭宿鴈天欲霜叢葦寒鴉日云暮
就中樓觀何王宮想見華年貯歌舞丹青倒景駭靈恠
粉黛含情怨幽阻青春遊子澹忘歸白日冷風帳中語
人間遺迹何足留最惜精思墮塵土郭熙平遠無散地
小米蒼茫托天趣銛鋒銳戟不破墨刻畫晶瑩昔誰苦
渤海細書藝文草精絕戈波絕回互南唐後主萬鴉圖
點點晨光動毛羽昔年曾見今日昏雖復逢之亦難睹

汪侯此卷出故家相示摩挲極愁予香奩犀軸見者稀
謾錄餘情示來者

盤車圖

大車鱗鱗牛駕軛西望太行雪千尺往時飛挽實長安
百兩仰闕過阡陌亂流十里九屈曲水濺車箱沙沒轂
前和後應日云暮王事有程車下宿旂旒央央昔臨洛
東南會期出方嶽侯伯有位賦有差載幣瞻迎來若若
君不見海艘百萬乘天風京坻連雲多腐紅天子視朝

大明宮千乘萬騎來何雄

贈羽士費無隱

東望雲林三十六聞有仙人結茅屋清露零零采紫芝
白雪深深斲黃獨國初山下苦流離義士傾家救世危
百年孫子俱華髮誰解燈前說舊時聖恩深重絕征戰
猶慮寒溫資暝眩身着黃冠寫古方薄素細書三十卷
相從寂寞久者誰禹穴山頭一布衣鬢如鴉羽顏如雪
跳入壺中夜不歸市人扣門呼不應光影俱消聲色泯

但言解隱不言無不道本無何所隱我欲作丹瀆水金
人間無藥不堪尋青霞如練還相覓華蓋衝天文室深

題漁村圖

黃葉江南何處村漁翁三兩坐槐根隔溪相就一烟棹
老嫗具炊雙瓦盆霜前漁官未竭澤蟹中抱黃鯉肪白
已烹甘瓠當晨粲更擷寒蔬共萑席垂竿何人無意來
晚風落葉何毯繆了無得失動微念况有興亡生遠哀
憶昔采芝有園綺猶被留侯迫之起莫將名姓落人間

隨此橫圖卷秋水

題韓幹畫馬

韓生觀馬十二閑時寫一二傳人間坡翁嘗來伯時宅
見此遺迹開衰顏前行如雲塵不動後者追風絕飛鞚
昔人能事已可能始覺賞識非虛諷昔觀秘府韓絕少
得見龍眠已驚倒使人讀詩如見畫人中豈復生坡老
五雲之中天上竒代產名駒天子騎神明尚令後古見
莫歎韓生非畫師

題黃都事仲綱山居溪閣圖二首

出山作官十載餘，聊托筆墨懷幽居。
連雲一一列眉黛，細雨往往逢樵漁。
隣家父老每載酒，隔屋弟兄皆讀書。
我久居山不待畫，獨念稚子扶犁鉏。

閣前流水秋愈深，故人東來還見尋。
方舟直過彭蠡澤，把釣坐對香爐岑。
雲中烟樹差可辨，江上鄉關誰與吟。
我欲芳蘭寄遠者，日暮天際多輕陰。

題秦毓二夫人承名遊華清宮圖

貴人並鞚如輕鴻承恩馳入華清宮道途先不止行客
策蹇奔趨烏帽風奚囊墮地何足拾豈有篇章浪相及
畫史當時妙墨傳光彩流動狂情急君不見白頭拾遺
徒步歸明眸皓齒事皆非朝天泥滑袖封事高閣雨餘
宮漏稀

方壺畫山水歌

方壺之山在海中世人欲見知無從壺中仙人閔昏濁
綵筆手開三五峰亭亭兩箇老松樹萬壑千崖閱今古

憶昔長從王子喬坐聽秋風最高處世人畫山非不多
不識真山奈若何君看昆崙上丹穴芝泉玉樹森婆娑
東望方壺應不遠飛度九州如過電便從海上問金公
莫待浮杯水清淺

示同

憶我蚤歲離親側足自跋跋心惻惻中年祿廩不及養
人羨清華已驚惕歸來老病五年餘閔子謀食躬犁鋤
蓬蒿羅生果窳異蛛網微細仍縈紆星河江上喜非遠

况與良朋適我願故人念我一相見暑中尚慎施樓轉
律詩五言

玉隆宮所藏宋乾道宸翰雲壑二字

昔者雲歸壑天章自九重日華常映鳳山氣盡成龍俯
仰遺陳迹高深儼德容飄然化春雨結想在高松

寄忽承旨

投老清江外依山結數椽扶藜循水竹把筆賦雲烟歲
熟無憂食秋清不礙眠故人相望遠北極在天邊

寄三衢守馬九臯

聞道三衢守年豐郡事稀詩成花覆帽酒列錦成圍鶴
髮明春雪貂裘對夕暉扁舟應載客閒聽洞簫歸

題朱澤民山水

積雪山陰道嵯峨筆底生雲門見童子禹穴閱蛟精高
卧人何在幽情幾詠成杜陵空想象晚飯拖樓晴

寄題汪道士草亭

飛白妙娉婷新題照草亭仙遺相鶴法客借換鸞經霧

雨歸懸黍風雲護茯苓遙知春晝永深坐養黃庭

黃敬延送竹本

分得瀟湘玉森森忽滿林香爐來曉色石檻借清陰好
共芝蘭長毋令草蔓侵清風月如晝老朽要長吟

聞鴈

樓近煖雲濕夜深歸鴈低聲音燈外盡羽翮月邊迷冉
冉白榆上悠悠黃竹西應逢穆王駿春草一長嘶

錢舜舉畫

一樹花如雪清明客未歸
坐看黃鳥並夢作綵雲飛翠
袖寒猶薄羊車過絕稀
相如能作賦月下卷春衣

山水圖

泛舟桑落浦望見香爐峯
野水常欹樹山雲不礙鐘
桃源携客覓松徑與僧逢
為託荆關輩添予九節筇

丹霞觀黃知微留別

寓館隔溪津過從厭市塵
振衣清露曉拄笏野亭春
歸作芝田主思存黍谷神
松華頻寄取老子欲輕身

題馬竹所畫

老樹依江岸歸舟傍釣竿
水花看晚淨風葉識天寒
鴈字來千里魚羹付一餐
遠山青可隱日下是長安

題曹霸馬

將軍今為庶畫馬寄高情
聚立天風起長嘶沙草生
飛揚萬里意凌亂五星精
日暮太行道悲哉長短行

荅陳溪山元日即事

積雪埃塵淨光風宇宙新
閒來知惜日老去善酬春
退

密觀羣動憑虛集百神真人起居法無一是違仁

送客北門晨登山木閣

晨登山木閣零雨煖於春溪水解留客梅花偏照人林
香知酒熟市遠覺民淳此地堪娛老惟愁度水頻

次韻陳溪山

移棹避殘暑開樽就夕陰冥鴻聊自達幽草若為吟
離索連三月棲遲共寸心遙憐溪上晚扶策獨臨深

又

乘興忽忘遠相思知幾何未便塵事少謾悔世緣多朝
食烹芝菌秋衣製芟荷平生但隨運何地不蹉跎

杏園詩為黃思順賦

善藥多陰德名花種滿園暄風吹雪盡暑雨綴金繁卧
護煩仙虎分嘗任野猿佳兒足文學食實似桃源

道園學古錄卷二十八

欽定四庫全書會要卷一萬六千三百五十六

集部

道園學古錄卷二十九

歸田叢三

元 虞集 撰

芝亭永言

律詩七言

與變元溥登仙遊和李浩卿韻

老去江山已倦游
况聞風雨滿溪頭
擬尋黃鵠望松壑
聊伴白鷗經稻疇
山崦有雲堪作供
酒樽無婦可歸謀

從教賓客回車晚，留取衰翁專一丘。

陳可復為予寫戴笠圖賦詩四首

浮雲滿空無所依，高岡獨行來者稀。
仙人冉冉遺松老，鳴鹿呦呦生草肥。
伐木遠聞何處谷，頌筐近得故時薇。
山中雨來霧先合，此日先生戴笠歸。

南園多竹暑氣微，始來結屋相因依。
掛巾石壁晝霧濕，沐髮池水朝陽晞。
頻年車馬踐霜雪，六月裳衣無綵絺。
鄰翁問舊坐來久，此日先生戴笠歸。

老去懸車百慮灰
西風獨愛菊花開
田家酒熟邀皆去
茅屋詩成懶更裁
欲及天清食沈澁
要觀日出上蓬萊
赤松有約應相待
此日先生戴笠來

捨却鄉人駟馬車
老身全不要人扶
雲霄一羽山頭杜
風雨孤村海上蘇
薄命長鏡隨積雪
多情破帽落輕烏
莫圍玉帶垂朱紱
此是先生戴笠圖

仙游道士余岫雲為從珠溪余隱士求得華山下
黃茅岡一曲規作丹室喜而賦之不覺五首

華山東下有茅岡云是毛公舊隱場清露尚餘丹滿白
白雲今許草為堂冬憑野燒開畬隴春託山雷淨石牀
從此便為千載計洞天先拜紫玄章

茅岡地主古醇儒乞我岡頭作隱居嶺上間雲從管領
澗中流水聽開除刀耕火種從茲始雨笠風瓢便有餘
自古詩人多會合浮丘毛氏不愁予

石人屹立古仙壇雙澗交流拱一盤臨水種松須匝
就中作室要寬安洞經即日脩真訣玉臼逢春浴舊丹

却恐山中添故事題詩莫與世傳看

仙游辦得茅千束華蓋須分屋數間微咏玉經忘我老
謾調金鼎勝於閒龍雷變化從舒卷鶴露清寒自往還
何似綺園諸老者採芝初不離南山

茅岡初割一溪雲玄契華陽舊隱文謁簡自題香案吏
封章先報大茅君種成和露桃千樹借與摩霄鶴數羣
便是宸清真洞府不煩夢想託紛紜

崇仁監邑阿賚仁甫茉莉花盆中折竹插之而生

枝葉近年翰林學士薩公謙齋作御史時亦有此
瑞朝之士大夫引寇萊公故事以為徵名其堂曰
瑞竹而咏歌之薩公仕東南歷郡守部使者所至
有仁政著清節美名者壽今為中朝老臣瑞蓋不
虛發也仁甫長邑三年清介明恕孚于上下此竹
之生父老庶士爭走山中相告因取而觀之畧寫
其狀賦詩以美之

華盆插竹忽生根枝葉青青向曉暎直節有生資地力

虛心無愧荷天恩
薩公堂上今重見
萊國祠前孰更論
但得清風千古在
常扶筇杖看淇園

撫郡天寧明極覺
講主陪敬齋監郡
奉祠華蓋特
有高咏三讀敬嘆
僕偶共清游輒復次
韻衰退不
工聊資咲粲

三峰宮殿接新橋
十月長齋陟翠堯
朝步仍垂蒼玉珮
登歌還引紫瓊簫
千枝絳蠟連星貫
五色香雲向日飄
賴有高人陪後乘
輕清詩句似參寥

鄧公信吾契家賢弟比奉憲臺書幣存問衰朽于
山中其還也無以為餞賦此與之

幙府秋高寄遠情飛鴻肅肅度江城深慚衰朽勞人問
豈有文章與世驚疏傳多年餘賜盡揚雄已老太玄成
憑君歸致殷勤謝擊壤田間荷聖明

故人將命清嚴地越陌經阡枉見存松菊荒蕪慚重客
裳衣顛倒出柴門老忘舊事尋書卷喜走鄰家覓酒尊
此邑故家無幾在更崇令德及諸孫

安成劉雲章漢章兄弟兩秀才來訪一長書一長
詩皆有志文學賦此為別

步履東行好弟兄束書銜袖見才英只愁困學孤來問
豈有竒聞外素誠知道言辭無詭妄及人事業匪縱橫
名鄉自昔多君子珍重歸來在矯輕

壽陳溪山生日

西來羈客作南居來往風流舊不踈好句每容鄰曲寫
高情不解世間書溫溫中夜還丹鼎冉冉高仙畢道車

千歲相期真有約九天風露壽尊餘

秋日同朋游北塔山

縣西北塔極蕭疎投老能來幾度餘山木也隨樵斧盡
屋塵猶護醉翁書遠懷天上多騎鶴近愛槎頭可釣魚
九日懸厓多細菊可能無意再巾車

縣道蕭條北客踈西人居者亦無餘春尋道士松花館
秋覓山人柿葉書太史闕文誰借馬相君退食尚烹魚
何因得似先天叟洛下人家揔駐車

歸田多病故人疎
好客相逢樂有餘
老去深盃那解飲
詩成大字尚能書
門生去上青驄馬
道士歸騎赤鯉魚
如此餘生多樂事
誰能七十始懸車

送尼山廟學彭山長

尼山新作素王庭
春告成功用上丁
徂徠有松充采斲
靈光何殿效丹青
風霆形氣皆垂教
金石文章具刻銘
天子萬年綏福祿
曾孫奉若薦明馨

游浴湖田舍

近郭林泉無可游行尋田舍逐微流春眠稍可遠鐘鼓
秋熟或能求豆區萬里橋邊祠廟古百花洲畔釣船幽
兒童不解憶鄉里老夢時時還故州

題范德機詩集後

抱膝長吟老范兄寒岩古栢兩同清東都高節鴻毛遠
南海真仙鶴骨成遺藁飄零存梗槩孤兒瘦弱賴高情
若無塵外知心友千古誰聞出世名

溪山翁所居與小雅易君相近翁與予賦詩易君

之季子至善輒隨錄之遂成巨帙賦此以答其美
意云耳

橫塘烟雨易東家翠竹娟娟映白沙
綵筆徧題詩滿卷
繡簾長對樹交花往來二老隨天分爛漫
三春感物華
却問綺園商嶺外曾無高咏到烟霞

題徐孟俊屏山閣

題詩遠寄屏山閣回首人間三十年
西嶠依然仙子館
東湖還載隱君船同時翰墨嗟誰在
滿屋詩書嘆獨賢

欲買一舟江海去，遠看喬木翠參天。

送易用昭

詩成長是倩人書，最愛東家織翠裾。
遠樹斷雲春雨外，華星明月晚涼初。
滿牕柿葉題都徧，短帽梅花畫不如。
莫向墨池成久別，鷺羣還欲謝宗虛。

和陳溪山雪中雪晴二首

柴門積雪未全開，千樹瓊林豈異哉。
鉛鼎微溫過半夜，玉經細咏却干灾。
江南水向川流合，天際春隨斗柄回。

太華高人觀物表詩成先寄鶴飛來

東風先散息寒威病骨欣然解帶圍日照瓦溝生淑氣
冰融硯沼漾晴暉銀旛試載花枝弱玉繪新嘗菜本肥
尊酒欲為君子壽除公誰是兩忘機

和陳溪山立春後三日即事

夢朝金闕見明晨滉泱牕間積玉塵三日新春三日雪
一分深雪一分春柳條封盡芽如粟梅萼飄殘實已仁
欲破鳳團銀盃凍冬溫且酌井泉新

寄陳奉常

并序

昔聞朝廷寧廟升祔奉常陳君新甫以世胄之貴游
博洽之高誼特奉明詔出使江海之上采上金名材
擇良工絕藝新作禮器樂器求在郡國之書與通樂
律之士以備一代之盛典焉鴻儒碩彥感嘆其委任
之隆非尋常效一職治一事之凡近而已故賦相餞
奇辭瑰句傳乎四方何其盛哉僕泊然老懷未忘舊
俗亦成一章奉寄

新廟工師謹駿奔奉常承詔出修門鑄金就采揚州貢
觀樂應求季札論功德頌成諧鳳鳥文章篆定刻瑤琨
千年製作于今盛擊壤猶慚荷宿恩

集自郡城歸溪山翁寄詩并和申字韻垂教依韻
再呈殊愧遲拙

暮春長日雨兼風買得江船未及東出郭故人邀杜老
輟耕田父訝龐公謾從脩禊忘溪曲何用安車徧洛中
旦起紫芝行復長詠歸先與謝崆峒

待客花陰午過申
茶香榆火一時新
千竿嫩綠搖輕暑
數萼餘紅墜晚春
坐憶雲林行道迹
夢遊仙島意生身
連根分種如冰雪
來向清池對玉真

謝陳溪山送蛾眉豆種

種豆南山憶故鄉
蛾眉分種喜封囊
底須飛鵠能銜子
未許蹲鴟共瀹湯
玉椀茶香分瑟瑟
瑛盤櫻顆間煌煌
燃箕煮釜催詩句
更約鄰翁共佛床

己卯秋舟過清江憶范德機

歸來江上鬢如絲
所謂伊人獨繫思
千載清風東漢士
百年高興盛唐詩
離離宿草秋雲斷
采采黃花夕露滋
山水含暉無盡意
他生何處共襟期

玉堂風日擅揮毫
海上馳馭嘆二毛
太傅竟無宣室召
拾遺空署華州曹
孤兒衣食交遊古
百世文章墓石高
車過不留應腹痛
寒泉秋菊賦離騷

宜春臺晚眺

長沙王子舊層臺
古佛神龍寶殿開
秋水繞渠三峽漲

春雲垂雨大瀉來萬家香火細緼合四面峰巒紫翠堆
最憶老藤陰覆地空中幾見異僧迴

廬陵歐陽德器游京以所藏先世誥勅見原功於
玉堂賦此以送之

充公族子不離鄉封誥于今幾世藏恩數重懷全盛日
標題猶是故時囊遠從史館求同姓未覺輜車滯一方
昭代治平多制作討論應及漢文章

送黃子勗

從師學道暫辭親百里西來動十旬夜讀松林堂下月
晝吟梅萼坐中春每欣老筆蛟龍走亦愛幽居鹿豕馴
春服蚤成還再到咏歌同向澗之濱

書武進縣學記後

縣令之職有社稷民人之寄不敢以百里為小也有
政焉有教焉不可以偏廢也陳君子瑛治武進脩學
校馮彥思記之可以知其所系之重矣崇仁之士觀
乎其記蓋亦有所感而不及為者豈非天乎因邑士

之意賦詩以書其後云

從容文學聖門優惆悵吳人獨子游百里絃歌誰濟濟
千年禮樂付悠悠邑人此日傳新記弟子遙知憶故侯
何事紫芝三秀地空聞踈雨過新秋

已卯臘八日雪為魏伯亮賦

官橋柳外雪飛綿客舍樽前急管絃僧粥曉分驚臘日
獵圍晨出憶殘年白頭長與青山對華屋誰為翠黛憐
唯有寒梅能老大獨將清艷向江天

漫空飛絮散輕絲所異寒威欲折絃縣令溫存僵卧叟
詞人解頌太平年剪雲為葉煩相寄種玉成田不受憐
丹鼎溫溫千歲熟樂天事業在知天

寄賀吳宗師七十壽旦

開府希年正樂康聖恩錫宴在斯堂歲周二十逢熙治
年按期願披寵光劔珮揔從仙苑集簫韶還就洞庭張
簪花當日今誰是試向雲籤閱舊章

舊德高年荷聖恩慢亭如宴武陵君松喬能壽多深隱

園綺來朝只暫聞，千歲天邊觀鶴髮。
五雲日下護龍文，山中七日陽初動。
遙禮三台過夜分。

和陳溪山元日後雪

瓊妃剪水散春天，坐下先迎華嶽仙。
飛步摠鳴蒼玉佩，閒居能檢白雲篇。
朝元閣近星辰北，獻壽盃深雨露前。
白髮舊時香案吏，幾迴七日是千年。

撫郡立都觀羽士，黃一初自京師還。
得大宗師吳公所為和詩三篇，其一故翰林學士吳先生廿年。

前廬山中所賦其一則和天師所與詩其一則予
在茅山羅山第一谷中送一初詩也臨行大宗師
囑之云到臨川即以示予也忽復一歲一初又將
北游却賦此一百六十八字記一初謝大宗師古
道高誼也

和吳先生韻

世外神丹起積痼
塵坐見月明過侯生
猶識遺經草
梁甫空成鼓缶歌
柱史通家今昔少
番君分祀子孫多

淒涼遠寄懷賢咏譜入朱絃久未和

和天師韻

白髮高居古道山蓬萊雲氣隱垂環尚方徧識前朝履
特進仍先法從班桃李成蹊春日滿風雲繞坐晝陰閒
梅仙舊隱玄都館紫陌紅塵有客還

自和韻

荒陂野色帶餘曛隴上時逢植杖耘靈囿鳳麟千載去
玉階鶴鷺此時分誦詩自託浮丘伯垂問長勤大隱君

為報黃茅岡曲舍簷端盡日宿浮雲

贈武夷道士羅鑑空兼憶范德機

學道應須住武夷青山綠水不勝思
九天清露三生夢
千古高情兩鬢絲
羽客鑑空猶有鑑
故人詩後更無詩
懸厓仙骨堅如玉
明月長歌覓紫芝

寄題采石新造觀瀾亭

雪嶺春融萬里來
浮雲天際兩眉開
魚龍夜水星前起
風雨春潮足裏回
尊俎誰陪賢太守
文章莫媿昔英才

無邊李白登臨意更覓遺碑步紫苔

集與胡伯友書問䟽闊稍久因楚石藏主待謁翹
仰高誼賦寄此詩

喬木千章萬壑秋使君清興在危樓
星沉夜水神魚化
霜落寒汀宿鴈留
紅袖烏絲耐楚客
畫屏銀燭看吳鉤
不知肯着枯藤杖
采采芙蓉涉遠洲

贈楚石藏主謁饒心道六有先生

不識南塘第幾橋
翠樓華屋上宮堯
古文獨許揚雄識

幽興誰為杜甫邀
伐木春聲生澗谷
涉江秋影蕩蘭苔
散花如雨携雙履
解與高人話寂寥

十月朔旦同監邑大用暨僚屬游北塔山

敗壁殘書五十年
重來山色尚依然
田疇稍稔農民喜
官府多閒令佐賢
黃菊不羞蓬鬢改
清尊一聽酒盃延
坐中有客天邊去
金榜春風待鴈傳

九月與薛玄卿外史會于黃氏溪園陪坐溪山先生談玄觀古仙像

自昔簪纓盛邑東新堂還見百年風
兩人白髮驚先老
一客玄裳喜暫同
食飲具陳先世業
耘鋤全效野人功
談玄不及紅塵事
盡日溪園樂意中

會後將登華山按茆岡玄卿先往候予至

石斛金釵感素秋
洞懸鍾乳入山幽
扶衰不是人間樂
鬪健聊為物外遊
雲作衣裳塵不染
詩成珠玉世誰收
石人久立黃茅月
歲歲能來為客留

予與玄卿相遇山下別後和朱德嘉韻奉寄重廬

賡和再用韻奉謝

茅岡七疊七香車誰賦新宮蔡少霞千歲留蹤丹井白
諸天獻供菜羹瓜石人雨立春衣濕崖密蜂來晝樹譁
憑仗仙翁湏一到浮丘已遣鹿銜花

和朱德嘉登華蓋山有賦韻寄薛玄卿和詩未成
登山已遇玄卿下山道中足成以寄

相期秋晚命柴車同看華峰散綵霞農父苦留杭似雪
山人先許棗如瓜蛟翻巨石痕猶在鶴立危峰語不譁

邂逅不留知有意林臺菊有未開花

縉山張君榮字仲華來丞撫之崇仁歷兩政六年
心平氣順上下相安如一日雖有遠役重勞亦無
闕事甚可稱也予之閒居相愛如故舊每懷扈從
東道往來縉山道中見其風土之勝民俗之美未
嘗不談道以為樂於其受代調官京師因記之以
詩而與之別明年進秩南來觀舊治父老兒童相
迎於東門之外又當歌此以為一咲之歡也

昔從時巡出縉山翠畦綠樹畫圖間驅車百折龍門險
載筆千峯虎帳閒麥粉勸嘗銀縷熟梁炊持獻玉漿還
道傍父老應常好為說鄉風一破顏

馬公同涉龍門道歎似山陰及武夷儘有千崖如罨畫
但無一棹弄清漪知君久有鄉關夢老我能無木石思
抱甕青梁供玉食饋漿道左野人誰

太平縣道喜年豐每出城南訪野翁粗有軒牕閒草木
謾留車馬翳蒿蓬心寬易醉毋多酌事簡無私亦屢空

好得公田多稼地長年歌詠聖恩中

集家世以文學為業亂離顛沛憂患困苦無敢失
墜然學未成而出早涉筆為文應事而已人或以
為能自知其不足也歸田以來稍得安閒而目疾
相嬰學不加進於立德立言之事無有乎爾也是
以所作事過即罷不復記錄至元庚辰冬臨川李
伯宗黃仲律來訪山中拾殘藁於敝篋得粗可屬
讀者二百餘篇而錄之賦此以謝

冰生鐵硯不堪磨收錄殘編夜每過老病自知才思少
應酬長愧語言多天人理一非無學內外篇分豈自訛
只恐玄經終寂寞空煩彌月駐山阿

荅黃仲律學文之問

少學文章慮每周鄉人未免是吾羞讀書次第依先覺
下筆流行稍自由血氣既衰尤帖帖神明自至但休休
聖賢端緒無歧徑篤信躬行莫妄求

重題環翠亭為李浩卿作

亭深環翠燭光寒曾與詩人語夜闌秋色相高風肅肅
露華如洗月團團莫疑窈窕圍歌舞自愛空閒接羽翰
我憶舊書陰德事百年應長萬琅玕

詩人謂燮元
溥觀志能也

荅馬竹所見示詩韻

黃茆分土勝封留惟有松喬是匹儔帶笠不愁山雨濕
倚筇嘗聽澗泉流玉堂夜永空餘夢瓦甕春生欲自浮
豈料朝雲停翠竹能從幙府一來游

壯氣橫秋勢利輕讀書讀律摠留情爭看撤幙清風起

歸拜懸車白髮榮
馬上詩成怜我老
尊前花發為君清
鳳池緩步春還近
莫厭羹魚斫尾頰

送吳文明

山雨牕寒詠楚辭
可人同有古人思
冰梅的的開生面
霜菊英英保令姿
詩似仙成隨世換
學如春到只心知
重來宜及東風早
華蓋茅岡長紫芝

冬至後陳溪山貺以佳句謹用韻奉荅

一陽初動反隆寒
久雨山居絕往還
彩筆曉題傳密意

綠樽春泛換衰顏
希夷睡足風雲外
安樂吟餘水竹間
共看往來閒
日月紛紛塵事不相關

雪夜有懷華蓋山王玉玄

三峰千仞玉穹廬
石骨金筋守靜孤
渺渺微陽丹建地
繚繚深息火生符
瓊林撐柱虛明兔
銀海奔吞黑赤烏
持酒相尋行迹斷
人間無鶴到蓬壺

答盱江聶空山

老去文章不滿車
蕭條家學賴兒扶
從師授業渠能達

對客揮毫我病蘓
春雨解憐轅下犢
朝陽愛及屋頭烏
德星何日賢人聚
膝上瑤環看畫圖

繞屋看山不命車
天寒翠袖自携扶
梅花照眼春常健
竹葉怡顏氣倍蘓
復有新雛娛老鶴
莫將舊事憶童烏
畫堂圍煖歌春雪
蜀錦波瀾列海圖

寄和吳閑閑大宗師

釣天樂徹洞庭波
野迥誰為擊壤歌
筆硯烟雲塵世隔
鶯花風雨客愁多
傳書稚子空遺簡
伐木樵夫久爛柯

舊識浮丘華蓋近相思何處看雲過

答吳宗師壽稀年詩韻

早接雲龍晚散萍三年交信祝脩齡公從天上承恩宴
我向山中讀道經老兔幸分千歲藥高鴻還借九秋翎
蓬萊清淺人應識拄杖過頭弁會星

老子長年藏室居舊聞星象動江湖尚方別賜三公鳥
維嶽恒馳六轡駒馬河中先聖畫麒麟閣上列仙圖
從游童冠俱頭白幾度涼風咏舞雩

能歌能辨九為章無限才情屬楚襄巫峽草生春易晚
渚宮花發日何長玄經寫就池皆墨國語成來日少光
把筆題詩亦聊爾坐中何用怪韋郎

送撫郡經歷海朝宗調官

館閣論思拜命新風雲近接屬車塵受釐宣室多清夜
奏賦甘泉是暮春雨過落花行處少日移高樹坐來頻
知君此日行吟思驄馬封章又避人

論撰西清近九天回頭二十五華年送人趨召迎新雨

對客停思倚暮烟
染翰朝朝裁五色
吟詩往往過群賢
故人若遇楊開府
莫說韋郎鬢颯然

寄趙知微廉使

魯賜玄州水玉丹
南征六月海生寒
宣威辨說誰為陸
列守文章孰是韓
溟渤不驚天蕩蕩
烟塵如洗月團團
故家文獻應催召
拭目雲霄一羽翰

題致爽樓

易君小雅雅士也
自其先長沙知錄
公老於是邑子

孫守儒業至于耆耆又以醫藥活人鄉邦稱世有善

人者也小雅與余年相近少相好也元統癸酉余自

京師還小雅觴余新樓之上望眺平遠山川邑屋烟

雲竹樹歷歷在目而易氏子孫或仕或處皆循循敏

藝而敦本小雅髮須郁然顏貌克悅諸子侍立若弟

兄之相次也余深嘆善焉小雅曰樓未有名也子為

我題之余以為米元章最號善標置嘗自名其軒曰

致爽子之樓四面皆可觀而西面獨遠請用拄笏意

字之曰致爽仍請賦之

易公屋上有青山故架層樓擁髻鬟客至每留風燕外
詩成多在雨簾間南階竹似兒孫長東老身同日月閒
若道神仙平地好便從南郭覓柴關

東坡墨竹

扁舟憶上浣花溪風雨橫江萬竹低石室歸來秋似水
峨眉相對醉如泥春雷翻石蛟龍起夕照穿林鳥雀栖
二老何年重會面為揮濃墨寫淒迷

白雲間上人度夏

白雲長傍太湖飛，忽向西江度釣磯。
彭澤小龍邀共飯，潮陽遷客憶留衣。
笋因春雨朝朝喫，橘待秋霜顆顆肥。
我自本名無所住，經函松下共柴扉。

寄龍翔寺訢笑隱

贏得歸來休便休，鶯花何處更追遊。
閒雲過雨依檐宿，好雨添泉繞舍流。
世上文章將底用，夢中塵業又何憂。
隨身宮殿香雲裏，還見千峯百海秋。

寄魯學士

往歲樓船過太湖，珠簾翠幙護圖書。
泉南五馬傳燈後，天上群龍進講餘。
滿座賓朋尊有酒，盈疇秔稻食多魚。
趣裝未覺曹叅晚，應有賢人載後車。

答甘允從寄海東白紵

海國練衣雪色明，寄將千里見高情。
著隨野鶴渾相稱，行近沙鷗亦不驚。
江露滿船歌醉起，爐烟携袖憶詩成。
秋風遊子偏愁予，誰采芙蓉共晚晴。

次韻董子羽見寄

家徒壁立相如宅森列雲山作畫屏前日遠煩天子使
至今猶詫野夫亭有來妙句題章草政爾齋居讀道經
積雪滿亭誰見問故人千里眼終青

昔年供奉慙清切簪筆春明近御屏一日携書歸菊徑
幾回對雪坐茅亭女蘿薛荔如新葺華蓋芙蓉歷舊經
最憶先生天上去皇都應見草青青

次韻答聶空山

惠我名香海上來
講惟還憶舊親陪
微風高閣紆天步
細雨深簾對露臺
滿袖當時携馥郁
孤村此日爨蒿萊
高人雅意相期遠
未覺匆匆白髮催

寄貞居張先生

司馬先生苦著書
久餐金液日清虛
星辰欲動含精劍
雲霧長隨畢道車
重憶仙翁千仞表
為脩真錄百篇餘
白頭供奉黃金盡
靈笈何因到隱居

孫宰金碧山水

昔代香山避暑宮中天積翠立芙蓉雲生金水三春柳
露滴銀床五粒松飛瀑橋長通窈窕斷堤人倦立從容
舊時行處今堪畫烟雨樓臺晚更濃

甲戌四月十七日至臨川冲雲寺祝聖壽齋罷為
賦此詩

郭西寺門雙石頭水檻相對林塘幽白花過雨落松暝
黃鳥隔溪鳴麥秋衰朽虛蒙宣室問淹遲實愛小山留
為貪佛日同僧話滿袖天香念舊游

蜀人鑄夢良效楊補之掀篷圖

錦屏山下花如錦，却愛清江野水邊。
放筆豈能無直幹，掀篷方欲闔清妍。
最怜半面歌扇更笑輕身障舞筵，
君看上林千樹雪繁枝，何處獨娟娟。

寄吳思可廉使

歲月將題傑閣成，寄來三筆荷高情。
知公比任中丞重，念我文慚吏部名。
王勃當年神所助，江淹老去夢還驚。
尚懷曝日茅檐下，解寫農謡詠治平。

寄南安燕信臣揔管

昔同禁苑又經筵一別于今四五年太守政成梅嶺北
老夫吟徹野雲邊愁來每看新題字夢裏猶懷舊奏篇
頗欲仙茅扶病骨想能函致到臨川

遊仙遊山賦詩

仙遊亭子北門東雲樹烟霞野逕通秋淨華峰千仞表
春濃仙縣百花中昔人黃鶴何年去九日清尊此意同
醉插菊花歸路晚莫令狂客惱衰翁

方壺作仙遊山圖

身在山中底用圖偶然點染出方壺數株古樹雲連屋
一箇橫橋水滿湖門外從教車馬過鐺中不計稻梁儲
等閒真遇尋師者指與雲間一翠渠

答錢翼之

吳郡名書盛有唐流傳風致到錢郎閒聞三月梨花雨
徧寫千林柿葉霜客看舊題驚歲月僧將新句度江鄉
莫愁茅舍淹留久秋菊春蘭各自芳

次韻聶空山送杏

看徧生紅雨滿林筠籠遠致百丸金遙知過熟心先喜
猶恐微酸齒不禁洗琰便應催泛蟻封囊何必共來禽
唯當種核成嘉樹花遶春壇坐鼓琴

和陳溪山春雪見貽

彌天春雪積塵空花信今為第幾風一色瓊林無別間
九年金粟有餘豐愁吟野徑雲俱黑睡起東牕日已紅
幸且與公同此樂豈辭微醉注黃中

予少年過薊門酒樓賦此題曰連十八書郡人疑其為呂洞賓詩此謾記于此

耳目聰明一丈夫飛行八極隘寰區劍吹白雪妖邪滅袖拂春風槁朽蘇氣似酒酣雙國士情如花擁萬天姝如今一去無消息只有中天月影孤

即事

四月十六日

卧病丘園忽五年千官此日正朝天縣公稱壽邀相共野老扶藜拜不前帶拭文犀看舊賜髮垂皓鶴愧初筵

莫言小邑天光遠朝蓋靈芝五色鮮

目疾偶成二首

一任榴花五月開看如烟霧亦悠哉靜聽靈響空中發
坐受天香世外來樂府好邀張籍賦策書宜共左丘裁
太清絕點誰能畫一瞬青蓮月滿臺

木綿鶴袖小烏巾百事無聞自在身舊是玉皇香案吏
今為華蓋洞天賓看花謾笑如烟霧落筆那能泣鬼神
聞有紫芝新可食園公有約願為隣

柯敬仲畫古木疎篁

不見丹丘四五年
幽篁古木更蒼然
蒹葭霜露風連海
翡翠蘭苕月在川
憶昔畫圖天上作
每題詩句世間傳
前村深雪誰高卧
亦有晴虹貫夜船

答盱江石門江秀才

石門山在盱江上
聞似金山及落星
浮石不隨春漲沒
道林常見晚雲停
鳥飛空界誰能賦
龍負經函我所銘
此地卜隣多逸興
重來為寫向幽亭

夢吳成季真人見訪夢中作

竹外旌旗駐馬鞍
兒童驚喜識衣冠
青山春日何須買
高閣浮雲只共看
野簌不堪供匕筯
新詩聊可助盤桓
當年赤壁扁舟夢
幾度人間玉宇寒

嘉平幾望陳谿山自山齋還邑月下獨步有賦

野迥霜明月轉高
寒花踈影立亭臯
池水下月蒼鱗鬣
雲海東迴雪羽毛
客去夜深猶倚杖
詩成春近更揮毫
茅簷數尺當晴昊
無限清歡一緼袍

莫愁寒日經簷短甕牖西南煖有餘頗有襟期俱老大
畧無塵滓涉清虛饑來進火烹仙朮定起和丹校道書
憑仗白雲封谷口免教人跡近幽居

題馬竹所照磨捕魚圖

霜寒水淨已無魚漁者縱橫罔不踈羹食盡供晨布遠
炊烟猶待晚歸餘已知漠漠濠梁異豈盡洋洋鄭沼如
萬里江湖春雨闊海鷗不去小舟虛

李伯宗錄詩

老去逢春祇謾吟，敢煩綵筆為追尋。
玉堂天上成塵夢，茅舍山中稱野心。
萬里雲霄歸鳥盡，孤村風雨落花深。
文章傳世知何用，空使高情慨古今。

壽陳溪山生日

風動蕭蕭白髮疎，高齋長日共清虛。
輕雷過雨神功外，瑞露垂雲壽瀝餘。
藜杖每期天外友，松昉更試枕中書。
九秋華蓋通天極，千載相隨兩鹿車。

鶴

予家有薛少保鶴一軸先尚書自蜀携至此邑以為
珍玩先參政晚歲失之不知何在當時極惋嘆今二
十餘年集妻姪浚儀趙德莊從好事者重購得之欲
集識其故而藏諸篋笥為賦此

吾家舊物薛公鶴老氣崢嶸壓九臯鐵石閣身脩足脰
雪霜依骨淺翎毛通泉久失千年壁杜甫空吟一世毫
老去思鄉歸未得時時借看倚秋高

二月雪與陳齊賢

江南二月長聽雨誰見翩翩雪滿舟病眼直驚翻玉樹
吟身渾欲覓貂裘衝寒載酒怜佳客把筆題詩想舊遊
得意長安各騎馬山堂還憶醉翁不

閩憲克莊以故舊託文公五世孫明仲遠徵鄙文
老退遺棄散逸荷伯宗用昭止善浩淵子勗至善
及余表姪孫陳誼子兄子豐仲弟之婿賈熙用昭
之從子大年等十餘人寒冬連旬日夜錄之得五
十卷亦已勞矣賦此為謝

老去斯文付寂寥寒枝枯甲一遺蜩虛言自歎真何補
好友相求不憚遙敗篋塵埃煩數子破窻燈火每連宵
書成明日尋梅去共看春風轉斗杓

送朱明仲歸建安并簡貳憲幹克莊

道南遺緒實天存徑寸神膠萬里渾路遠祇憑霜履穩
歲寒更覺緼袍溫山川文物今誰在師友淵源尚可論
弱翰不堪酬使者遠來深愧考亭孫

送王公輔遠遊

君子之所居雖歲月易遠而餘風流韻不自知其及人之不窮也空山雷先生隱於種湖之上豪傑名勝多從之遊其光顯盛大者固已著見于代其高尚深遯者則有不可得而知者矣然種湖猶有先生遺書數百卷與平生著述皆無恙也湖觀之師弟子相傳而守之其寥廓之趣粵古之思必有彷彿其精微者乎至元二年丙子正月六日大雪道無行人有羽士王公輔自種湖來袖詩一篇為贄觀此風致諒非俗

塵所能固有得於君子者乎聞其年纔三十喜其盛
年好讀書苦吟聞其將從吳越淮泗而遂至乎京師
故作詩以送之

春雪門前二尺深子喬雙鳥度幽岑欲吹藜杖同清夜
靜看梅花對苦吟江國鶯花時冉冉京城烟雨晚駸駸
老來每憶登臨處仗子芳年一一尋

題趙師舜謝安遊東山圖

太傅東山杖屨行總將憂患托高情獨尋窈窕開瑤席

雙引娉婷韻玉笙春雨松間殘奕冷秋風江上莫塵生
三公籌策頻煩甚惆悵雲霄一羽輕

活水源為王欽道賦

川上嘗聞感聖衷尋源曾見出泉蒙風霆流動千門闢
山澤高深一氣通潤物已隨時雨化濟川猶歎昔人功
野塘舊隱誰能住一勺清泠謝太空

夜宿周氏簡饒復心李伯宗

復心與伯宗留宿周氏東齋談易論語集註至於達

旦某以微疾不得奉陪然心甚喜雞鳴賦此章寄之
霜月高齋宿兩賢夜深清話極幽玄退藏莫測神明化
通變猶聞典禮傳五十華年思絕學二三良友信遺編
選鋒若欲驅殘臘晴昊梅英孰與先

贈朱萬初之官建寧

仲春之望建寧幕長朱君萬初之官迂道百里惠訪
山中存撫老疾深感古誼得見禁林貴臣名公書報
萬初延閣機暇得進所製新墨甚稱旨意中書傳問

所居官將有朝擢之喜良為助慶因賦此為別云
墨卿玄壁進明光玉硯雲興御榻香內相貽書傳異賞
中朝垂問仕何方宗家應訪金絲舊古道相求草木荒
把筆欲題新感遇牛衣春夢鬢蒼浪

絕句五言

題汪華玉子昂蘭石四首

海內出珊瑚枝撐碧月孤蛟人拾翠羽泣露得明珠
參差不可吹紉佩寄遠道遂令如石心歲晚永相好

抱玉下天河繞叢秋霜多天寒翠袖薄日莫欲如何
翠袂倚岩堯來尋碧玉簫拂衣成歷劫遺迹映寒潮
題黃與可所藏錢舜舉瓜圖


秋蔓有遺實不食庸何傷東陵為圃地何曾憂雪霜

道園學古錄卷二十九

謹案卷二十九第三頁前八行阿賚舊作阿里今

改後放此





總校官庶吉士臣張能照
設對官檢討臣龔大萬
謄錄監生臣左顥若